

23/02/1998

MSC perkembang teknologi maklumat dunia: Pakar

KUALA LUMPUR, Ahad - Pakar terkenal bidang teknologi maklumat (IT) memuji projek Koridor Raya Multimedia (MSC) yang dibangunkan kerajaan sebagai sesuatu pembangunan prasarana multimedia yang lengkap.

Naib Presiden Teknologi International Data Group (IDG), Dr Robert Metcalfe, berkata MSC adalah projek bercita-cita tinggi yang menggabungkan pembangunan aplikasi dan perundangan yang lengkap seiring dengan perkembangan IT di seluruh dunia.

Dr Robert yang juga Presiden Persatuan Alumni Institut Teknologi Massachusetts (MIT) Amerika Syarikat, berkata tujuh aplikasi perdana yang digariskan dalam projek MSC merangkumi semua aplikasi yang mungkin.

Beliau berkata, aspek perundangan projek itu terutama jaminan maklumat melalui Internet tidak akan ditapis adalah amat dialu-alukan.

"Saya cuba sedaya upaya memikirkan aplikasi yang kelapan tetapi tidak berjaya," katanya menjawab soalan selepas menyampaikan syarahan bertajuk 'Masa Depan Internet' pada majlis makan malam anjuran Persatuan Alumni MIT Malaysia, malam ini.

Projek MSC menggariskan pembangunan tujuh aplikasi perdana iaitu Sekolah Bestari, Kerajaan Elektronik, Kad Pintar, Kluster R&D, Pemasaran Tanpa Sempadan dan Pembuatan Global Web.

Perdana Menteri, Datuk Seri Dr Mahathir Mohamad, menghadiri majlis itu sebagai tetamu kehormat.

Hadir sama ialah Presiden Persatuan Alumni MIT Malaysia, Tan Sri Dr Othman Yeop Abdullah dan Yang di-Pertua Negeri Pulau Pinang, Tun Hamdan Sheikh Tahir.

Dr Robert yang kini terbabit dalam usaha mempertingkatkan keupayaan Internet, bagaimanapun, berkata projek MSC ini tidak mewujudkan persaingan kerana hanya satu syarikat telekomunikasi dilantik sebagai pembangun prasarana IT projek itu.

Menurutnya, pembangunan prasarana IT adalah usaha yang berterusan dan perlu ada persaingan dan kerjasama di antara syarikat bagi mendapatkan pulangan yang terbaik.

(END)